

宋平江城坊攷

地750.22

179.924

部=1~4



宋平江城  
坊

乙丑春日

吳湖帆署





吳中方志之作。六朝而上書闕有間矣。唐陸廣微吳地記。宋朱長文吳郡圖經續記。惟輪大輅。粗具規模。至范文穆吳郡志。盧教授洪武蘇州府志。王文恪正德姑蘇志。奔葉流芳。始具博大精微之觀。惟伊古蘭臺天祿之藏。左圖與右史並稱。我吳自祥符圖經失傳。蒙兀兒朝以前。往迹幾不堪重問。何幸平江圖碑矗立郡庠。巍然爲魯殿靈光。圖續續密。古氣磅礴。南渡舊迹。猶照人耳目。蓋自唐失其政。海內分裂。雖吳越錢氏以保境安民爲職志。而漢魏以來之古迹。已蕩然無存。圖經續記所謂郡郭三百餘巷。皆有名而失之者。板蕩之迹。蓋可覩矣。建炎兵燹。胡騎戎馬。馳突相乘。逐居游牧之風。所至以焚掠殘毀爲天性。吳中坊市。悉夷爲平地。讀徐大焯燼餘錄。猶可想見當時慘狀。吳郡志所謂建炎狄難吳中。古名屋惟城南覺報寺。子城天王堂。以酋幕僅存。至今訪古城市。自橋梁題刻以地下。隱僻獲免。而外。凡地面以上。幾無一碑一刻之遺。北禪寺門左一井。闌題紹興三十年紀元者。已爲城中至古器物。毀滅之酷。蓋若是其烈。

宋平江城坊攷序

也。平江圖碑始不祥其何時所刻。程氏祖慶吳郡金石目亦僅據瞿木夫說。以刻碑人呂挺張允成允迪三人姓名疊見。宋理宗寧宗兩朝碑刻遂斷爲南宋故物。而未詳其年月。余因讀趙汝談吳郡志序及吳郡志官字門所載紹定二年郡守李壽朋重建坊市故實。始悟平江圖碑亦必刻於是年。證以碑中公署寺觀。凡建於紹定二年春夏以前者。圖中悉有。秋冬以後新建者。卽無益信。刻行吳郡志與復古名迹。鑄成平江圖。悉在是年。因博稽唐宋以來史傳志乘金石文字。集部筆記之屬。仿大興徐氏唐兩京城坊攷江陰繆氏京師坊巷志之例。舉凡坊表橋梁壇廟寺觀官宇第宅園林山水之屬。圖有題榜。無不一一爲之考證。時當己未庚申間。方爲邑修志局網羅。放失舊聞。兼助纂金石藝文坊巷橋梁各門志。冀乃陳書發篋。有所得。則露鈔雪纂不足更通假親戚故舊所藏。以補益之。於金石文字。則自諸家箸錄。而外更刺舟周歷城內外。挾氈墨以自隨。解衣槃礴。日摩抄於廢橋荒寺間。土人觀者。輒如環堵。咸目笑其癡。而余





夷然不以介意故是編所采撫金石文字多前人未著錄品又  
以是圖街巷皆有圖而無題榜因見盧教授洪武志坊巷門其  
名稱均與趙汝談續補范志坊市小注相出入又以洪武志鄉  
都門與正德志互校始知盧志專尚稽古王志乃遵時制證以  
所得天水一朝殘碣斷幢古井石柱所題刻施主鄉里街巷與  
盧志又一一符合益信盧志巷名多有宋舊稱爰冥行塗索以  
通衢爲經支巷爲緯逐一補榜亦爲考證於是橋梁坊表諸事  
始同條共貫有序不紊其名稱失傳之街巷凡圖所有者爲之  
遵宋人體例逐條補入或綴以舊稱之近古者仍注明未見著  
錄以資區別凡書所有而不能確指卽爲圖中何巷者另列一  
表附諸卷末以志蓋闕之義並將各古志鄉都沿革及紹定二  
年後續立之坊表橋梁官字爲是圖所不及載者殿焉其朱氏  
續記暨范盧王三志小序亦弁諸卷首以資讀者考索又援以  
經證經以史證史之義將范盧王三志參伍錯綜互相鉤稽因  
園第門監師稷提刑所居萬花堂在資壽寺後是圖寺在今鈕

宋平江城坊攷序

家巷南而悟藍家巷卽康熙志之鑾駕巷亦卽今鈕家巷藍鑾  
鈕三字家駕二字互爲音轉也姑蘇志朱香獅巷卽在是圖張  
師橋附近因悟朱張雙聲張香疊韻易詞言之朱香獅卽張師  
之反切耳以此例彼王志之張泥金浜巷顯係盧志船塢橋注  
中之張林浜泥金切吟林吟疊韻遂致沿誤也至於古巷名驟  
觀之不能知而細核古志可參稽而得者若許蘊子巷舊志向  
未注明其址姑蘇志橋梁門鄔家橋在許蘊子巷口是圖鄔家  
橋在今西麒麟巷口因以知許蘊子巷卽今西麒麟巷且以杉  
濱巷姑蘇志作蓮花池巷於附近東西采蓮射采之義近因悟  
一巷兩名遞嬗因革之理以宋知州賈青造樂籍堂事盧志載  
樂營堂巷下王志載晉寧坊巷下因悟樂營堂巷卽今晉寧坊  
巷以是圖旌義坊卽在馬脊梁巷而悟近志並載二巷之謬以  
志載流真巷因柳氏貞女居之而就厥諧聲改號柳貞因悟明  
王敬臣所居之大儒巷卽宋報恩寺塔殘磚所稱之道義鄉大  
木巷必一名大樹巷又以宋人以雄節爲南營全捷爲北營威



果必爲中營而知盧王二志失載中營基巷之非因盧志氏族門諸姓吳音讀如遮遮與查疊韻因悟吳郡志之諸家橋卽是圖之查家橋而近志所稱查先生巷當從盧志作諸先生巷所見亦是其餘補舊志之闕者則官字門有贍軍務與宋史兵志合川澤門有燕塘匯在齊門外與世傳東匯西匯符凡若此類不勝枚舉藉微是圖奚資考覈此外於舊志罅漏俗稱謬誤之處參據典籍以匡正者不知凡幾其須旁徵博引疏通而証明者更附凡見以詳說之務使語不離宗證據確鑿無一語無來歷無一字之杜撰而後安蓋窮年累月兀兀不休者七載於茲矣若夫姜家巷之普照院佐家橋之報恩院濠股巷之竹堂寺圓通橋之資福廟北園之北觀音院飲馬橋之資福東院藍家巷之丁晉公廟宮巷之更衣亭盤門之收稅亭葑門之接官亭盤外之通濟院閻葑外之利濟院子城及盤閭葑門之土地廟以及叢家庵張家庵程宅墳白坡山或事涉細微或地居隱僻徧檢羣書羌無故實倘蒙海內鴻博發其艱藏示以南針則一字之師奚翅百朋之錫乎又姑蘇志坊巷門所載錦繡坊巷阜通坊巷迎僊坊巷真慶坊巷與是圖所載其分隸之四隅不同可知盧教授所謂坊巷之名詢於芻蕘父老有不能舉其名者果信而有徵李太守所重建有不能盡在古坊原處者矣此自來修志家所未及亦因得是圖而創通其義附識於此以見志才之難乙丑陔月吳縣王譽自序



宋平江城坊攷卷首

敘目

吳門表隱蘇州城圖宋時勒石郡學而地名詳備者

乾隆十年知府傅椿鏡板行世四十八年知府胡世銓重刻

坊市

吳郡圖經續記圖經坊市之名各三十蓋傳之遠

矣如曳練坊者或傳孔子登泰山東望吳閶門數曰吳門有白馬如練因是立名黃鸞市之名見白公詩所謂黃鸞巷口鸞欲語烏鵲橋頭冰未消是也其餘皆有義訓不能悉知其由其巷名見於載籍者如彈鋏渴烏一二種皆莫知其處迺知事物不著於文字之間則艱於傳遠故方志之說不可廢也近者坊市之名多失標榜民不復稱或有因事以立名者如靈芝坊以樞密直學士蔣公堂爲冠坊因侍御史范公師道德慶坊今太子賓客盧公革各以所居得名蓋古者以德名鄉之義也苟擇其舊號益以新稱分其邑里因以彰善旌淑不亦

宋平江城坊攷卷首

美哉昔梅福棄官易名姓爲吳市門卒今此有西市門殆其所隱乎 葉夢得避暑錄話吳下全盛時衣冠所聚士風篤厚尊者老來爲守者多前輩名人亦能因其習俗以成美意舊通衢皆立表揭爲坊名凡士大夫名德在人者所居住往往因之以著元參政厚之居名哀繡坊富祕監嚴居名德壽坊蔣密學堂居嘗產芝草名靈芝坊范侍御師道居名爲冠坊盧龍圖乘居奉其親八十餘名德慶坊朱光祿居有園池號樂園坊 吳郡志長慶集云六十坊者舊經所籍如之後頗隨事而有創有易今六十五坊 按坊名表與本圖同 紹定二年春郡守李壽朋並新作之壯觀視昔有加 盧熊蘇州府志易曰庖犧氏沒神農氏作日中爲市古史考曰神農作市世本曰祝融爲市周禮司市有大市有朝市有夕市蓋古之市卽今之坊也市門卽坊曲也蘇鸞演義曰坊方也言人所在里爲坊又方以類聚居者必求其類故



秦漢有市門之官吳之坊市見於傳記舊矣如越絕書云闔閭舞鶴吳市又吳市春申君所造開兩城以爲市按伍員鼓腹吹篪乞食於吳市漢梅福棄官爲吳市門卒皆是也故干將坊卽東市門又東則盡市橋西市坊卽西市門又西則市曹橋并穀市橋小市橋據此則吳舊市在東西街今在街之南北未詳何時所徙或云建炎兵火後也白樂天詩云七堰八門六十坊其名已載舊經嘉泰初年四月郡守趙不艱復改俗號表以嘉名是時去建炎四年已七十載詢於芻蕘或有失其舊者紹定二年李壽朋重立六十五所咸淳中黃萬石又新之茲以城內樂橋正居市中心故就橋下少北十字街界其坊市爲四隅其不在郭中則分屬於各門之外庶使後人易於觀覽焉 王鑿姑蘇志表厥宅里自周有之所以賢其人也後世乃以表科第近又以表其官此有司崇重激勵之意其亦盛矣吳中古坊甚多其巷名亦

宋平江城坊攷卷首

多沿於古今並列焉然其義則或有不可攷者矣

橋梁 吳郡圖經續記吳郡昔多橋梁自白樂天詩嘗云紅闌三百九十橋矣其名已載圖經逮今增建者益多皆登石螿螿工奇緻密不復用紅闌矣然其名未嘗偏錄也近度支韓公子文爲守命每橋刻石於旁幢幢往來莫不見之其有各自古昔或近事可述者記於此 吳郡志唐白居易詩曰紅闌三百九十橋本朝楊備詩亦云畫橋四百則吳門橋梁之感自昔固然今圖籍所載者三百五十九橋在郡城者今以正中樂橋爲準分而四達隨方敘之門外及外縣略附見焉 盧志吳郡號爲澤國因震澤巨浸東接五湖又東注入城闔縱橫交流居民賴以灌濯凡舟楫輿販悉由是而旁通焉故橋梁爲多唐白樂天詩云紅闌三百九十橋自宋以來皆疊石螿螿堅巧緻密始不用紅闌矣熙寧中度支郎中韓鐸乃命刻名於旁楊備亦云畫橋四百龔氏三百



六十皆舉其大概耳今以市中心樂橋爲中而左右分爲兩縣其在左者居東屬長洲縣其在右者居西屬吳縣其在城外者各隸其五門之下 姑蘇志蘇爲澤國環城內外皆水也故橋特多觀樂天詩云紅闌三百九十橋可見矣自宋以來始贅以石而增建益繁今舉郡縣輿梁之大者書之而不甚著者略焉

寺觀 吳郡圖經續記自佛教及於中土旁及東南吳赤烏中已立寺於吳矣其後梁武帝事佛吳中名山勝境多立精舍因于陳隋寢盛于唐唐武宗一旦毀去已而宣宗稍復之唐季盜起吳門之內寺宇多遭禁剽錢氏帥吳崇嚮尤至於是修舊圖新百堵皆作竭其力以趨之唯恐不及郡之內外勝刹相望故其流風餘俗久而不衰民莫不喜蠲財以施僧華屋邃廡齋饌豐潔四方莫能及焉寺院凡百三十九其名已列圖經今有增焉考其事迹可書而圖經未載者錄于此至於湖山郊野

宋平江城坊攷卷首

三

之間所不知者蓋闕如焉又有寺名見於傳記而今莫知其處者晉何點兄弟居吳之波若寺又故傳唐有乾元寺戴逵之宅也冥坐寺張融之宅也又有龍華禪房唐慈崇福慈悲陸鄉數寺皆建於六朝之間而龍華冥坐之額乃陸柬之書今莫見之矣 吳郡志在城仙佛之宇皆中興重建或謂天慶觀門廊能仁報恩大殿比舊加壯云 盧志東南寺觀之勝莫盛於吳郡棟宇森嚴繪畫藻麗足以壯觀城邑歲月薦更重懼燹毀古跡多廢鞠爲茂草者有焉今姑錄其名額處所以備參攷若夫其詳則見諸碑碣題詠茲不復紀 姑蘇志吳中多佛老之區雖更洪武歸併而其廬故在焉旣不可廢則列其叢林而諸歸併者各附見焉

祠廟 盧志夫祀有國之大事郡縣之常典所以重民生崇報功也然有壇墀焉有廟貌焉今各陳於下云 姑蘇志吳中祠廟列祀典者祝文並從內降歲二祀或一



祀惟其功德之宜而郡人所私祀亦或有義故悉列之若郡縣常祀已具洪武禮制此特著其建置歲月耳

官宇

倉庫

驛遞

吳郡志吳中佳麗自昔所聞建炎

兵燼所存惟覺報小寺及子城角天王祠今州宅官廨學舍倉庾亭館之類皆中興後隨事草創不能悉如舊觀輒攷故事併異時名額識之以備攷古 盧志自昔郡縣蒞政必有常所蘇之爲郡宋元以來號稱最盛若公署帑庾征商工作之司傳郵之所棋布星列徧於境內及夫亭館臺榭之處雖屢更變易而遺黎故老猶能歷歷言也故用與今官宇併錄之 姑蘇志歷代廨署有因有革而其地亦皆可考今先列國朝定制而附綴舊聞以備郡中故事若學校則別書亦以政教之角立也 又儲侍國家大計今具錄倉場而前代名跡存者附之以備稽考 又驛遞之制見於諸司職掌甚詳蘇爲江南要路凡使傳公移水陸行者晝夜憧憧不絕此

宋平江城坊攷卷首

四

驛遞鋪舍之設皆當立焉

學校

盧志學校之設自二代而下歷漢唐以迄宋元其所以爲教者亦云備矣蘇之學由范文正公典鄉郡捐宅爲之重以安定胡先生主教事後之繼守者莫不接踵興起增飾學舍廩稍食以養之版經籍以教之其在屬邑莫不皆然至若昔賢之道德功烈志操足以師表百世者亦皆請額于朝建立書院雖棟圻震澤去郡百里皆得以建義塾人才輩出代不乏人今大明一天下尤以學校爲先務慎選舉以崇教職嚴條約以厲生徒祿廩之給掌之有司學校不與也諸生業成賓興之太學而蘇之得人尤多蓋以禮義之邦際文明之運宜其彬彬向風矣 姑蘇志今天下言學校必首蘇蓋有范文正胡安定之風焉其中島池亭榭尙多吳越元璋之遺其勝亦他郡之所鮮也況人才往往爲天下先乎若夫作興敦率使教化行風俗美則不能無望於上之人



焉

營寨 盧志兵之有衛自唐始兵之有營則古之制兵不雜於民所以嚴武備焉蘇爲輔郡武備不可少弛營衛不可不嚴宋度曠地立營以居廂禁軍人嘗有其處矣久而不治兵政遂弛本朝崇武以一四海賦兵有制練習以程講武以時分衛別營備禦無缺此兵制之所以備於今日也 兵衛又案吳門事類云兵之有營制也蘇祖在御其禁極嚴吳爲輔郡武備營壘不可不建紹定間吳淵爲瀾西提刑爲之新其垣墉相度舊址可建五百楹又以牧放新寨多閑曠地遂請於朝得一千三百楹徹而新之號曰新營使歸其行伍安其室家不雜處民間也復爲市田一千一百八十九畝歲收米千三百一十五石司之廩人爲軍中喪葬吉凶之費每一人給廿券爲之定式 姑蘇志吳非用武地而濱江帶海亦東南要陲也宋元兵防頗詳自歸附後朝廷立制守城備

宋平江城坊致卷首

五

倭分列營寨又置巡檢司以事察捕今具述之而舊蹟稍存其概云

禁軍 盧志宋初盡選驍勇部送闕下以補禁衛餘留本城康定初置宣毅軍大州二營小州一營慶曆中募健勇爲宣毅或選廂軍爲之蘇州一指揮熙寧三年改威果嘉祐四年詔置禁軍三指揮其新招禁軍以威果爲額大觀二年詔望郡別屯一千人一爲威果一爲全捷並以步軍五百人爲額四年三月撥杭州威果第二第三指揮蘇州駐札宣和二年因討睦寇仍以全捷兩指揮爲杭州東南第三將駐札宣和四年因方臘之亂二月詔增置戍將五年十一月下江浙諸州各置威果全捷兩指揮隸侍衛步軍舊制每指揮各置都虞侯指揮使副指揮使都頭副都頭錢米衣賜各有差

第宅

園林 盧志郡內外有邸第園池者所以載昔人



居止游衍之地也士大夫之客於樂土或窮奇覽勝以紆豫其懷亦人之常情哉故因其舊跡遺址皆宜附錄焉使後人覽之則知此爲某官之邸第彼爲某氏之園池非獨可究其當時之出處而歲代久近子孫興廢者從可徵焉 姑蘇志第宅園池何以書賢乎其人也賢乎其人則何以及乎第宅園池古之人其不可復作矣君子思其人而不見見夫人之所嘗止猶見夫人也詩云蔽芾甘棠勿剪勿伐召伯所茇

古蹟 盧志蘇爲東南名郡山澤之勝古迹可考者蓋班班焉若尚父子游之居闔閭夫差之經度其來遠矣以至高人異士之棲息歌樓市肆之繁華及夫某水某邱經名儒墨客之游詠者可謂百世之下爲隨之顯不得不悉書以備搜訪 姑蘇志古今之在天地間猶旦暮也而古人所遺每爲今人所重雖故墟阨隴往往過之爲躊躇而不忍去豈非以其廢興存亡有足感耶吳自

宋平江城坊攷卷首

泰伯迄今其間古迹多矣悉記於篇以備後之考者

山水 盧志郡城之山皆在西惟洞庭兩山最爲高廣而在太湖之中西山有林屋洞天世稱爲福地皆屬吳縣而長洲崑山常熟之山僅餘四十若川澤浦蕩之名則不可勝紀而數倍於山今詳錄以備攷焉 姑蘇志吳中諸山奇麗瑰絕實鍾東南之秀地理家謂其原自天目而來發於陽山分華麓而南迤邐天平盡於靈巖別由穹窿而東盡於楞伽以及湖中諸山若虎邱於諸山最小而名勝特著且非有所附麗故首列之 又吳號澤國水經所謂萬水所湊觸地成川者也其源西自太湖東入於海承衍支蔓不能詳舉舉其大者著於篇 城郭 盧志自古城郭之設爲保障斯民之計其來尚矣故有城則有門凡抱關之吏所以節出入慎啓閉而防奸暴也環城之外有河內有涇卽古之四面城壕也民居其間又水陸分二路縱橫交錯是以水置橋梁陸置



坊巷無非通舟車貨財出入者如此然城有廢置門有損益各隨時宜攷古證今悉見於下 姑蘇志凡設險守國必有城池若夫支川曲渠吐納交貫舟楫旁通井邑羅絡則未有如吳城者故雖號澤國而未嘗有墊溺之患信智者之所經營乎其廢置損益列如左

鄉都 盧志郡中都會既已界爲四隅之坊巷矣其在郭外釐爲七縣各具于鄉村里保雖去府治漸遠而併屬於茲郡之管轄今詳著于篇亦以見中吳都會其廣袤若是歟 姑蘇志今制聯民有鄉里都圖區保之名雖與古異亦先王鄉田同井使百姓親睦之意也若郊外民居所聚謂之村商賈所集謂之鎮雖不列於官亦以類附書焉

塚墓 姑蘇志周禮墓大夫掌凡邦墓之地域而爲之圖今制忠賢之藏則爲之置守護禁樵牧亦先王遺意也獵往代采近事以著于篇 盧志周禮墓大夫掌凡邦

墓之地域而爲之圖後世無有也然樵牧有禁發掘有刑則著於律書吳由春秋而下數千載之間墟墓猶有存者於是類古圖經之所紀而以宋元者附益之俾世世有考焉